

Kerweredd 2011

03.07.2011

Carolin Westrich

Wir sind lieber blau als Grün!

Ihr lieve Leid un Kerwegäschd,
 e Johr is rum un mir han werre Kerwefäschd.
 Gefräd hammer uns un sinn all gud druff,
 un hans gepackt mit unserm schöne Strauß die Fels enuf!

Wenne mer gefrod hat, kemm is gefall ebbes in.
 Ich weiß wieso ned, ihr wollte All ned in mei schäni Redd enin.

Drum hanner gesa, dass war nix los,
 ich han iwwerled: „Was mache mern blos?“
 Doch jetzt kann ichs san, ich werrs eich verrode,
 mir han in Nerremohr schon paar Chaote!

Es is wies is un bleibt a ned aus,
 e Macke find mer an manchem Kopp oder aneme manche Haus.
 Ihr kenne gespannt sin uf das was kommt,
 es spielt ersch die Musik, mei Redd die folgt prompt!

- Musik
- Straußbuwe

Es is ned so efach heit se Dachs in unsrer Politik,
 noch ned mol zum Abschreiwe hannse in Berlin e Geschick!
 Die kopiere un mache, erfinne Benzin von dem se kä Ahnung han,
 die Grüne die fron sich: „Was mache die dann?“.
 Ja die sin schlau un rame es Feld uf von hinne
 un dun dodebei a noch an Macht gewinne!
 Mer kennt schon faschd san – in de Politik isses wie im Lotto-
 „Lieber blau als Grün“ is deshalb **unser** Motto!

- Musik
- Straußbuwe

Ferdisch mit de Nachrichte ausem große Berlin,
 jetzt komm ich zu eich – jetzt gugge mer mol no Nerremohr rin!
 Ich hans schon gesa, ja mir han Chaote,
 die Waldstroß beherbergt e Familie mit lauter Bruchpilote.
 Es Auto vom Schanna kann sei Fahrer ned leide,
 wem Gabi hanse kenne die Garage nei verkleide!
 Do mennds es fahrt Porsche meme offene Verdeck,
 ich sah eich awwer, dass es fahrt e Skoda meme offene Heck!
 Das wär jo bis jetzt alles gar ned so schlimm,
 hätts ned getsann in seiner Garage - un zwar drin!

Wenn mer will raus fahrn, nur mol schnell weg,
 dann sollt mer bedenke: Es is kä Porsche, sondern e Skoda meme offene Heck!
 Do wars schon bassiert, ja do hats gekracht,
 es hat mit seim Skoda die Garage kaputt gemacht!
 Ihr Fraue ich sahs eich, es Gabi is schlau,
 das war Berechnung, schließlich wollts e nei Garagedor fer denne alte Bau!

- Straußbuwe

Awwer ned nur die Zwä han Probläme mit ihm Gefährt,
 a em dritte im Bunde, sei Audo ihm es Läwe erschwärt!
 Kofferraum uff, Kofferraum zu?
 Im Wolfgang seiner Nas war e Riss im Nu!
 Die riesisch Kofferraumder vom Touran,
 hatter sich gehau an sei Nas dran.
 Gefall is er domols iwwer de Fahrradstänner,
 die Nas war kaputt, warum sad dirs dann kenner?
 Das muss der so langsam doch selbschd e mol stinke,
 ich bin ehrlich zu dir: „Weg mit dem Zinke“!

Mer werdd wohl noch lang do driwwer verzehle,
 wie ihr eich mit eire Autos rumquäle.
 Dodevor muss mer sich awwer gar ned scheniere,
 in Zukunft sollte ner liewer e Bobbycar schofiere!

- Musik
- Straußbuwe

Mir schreiwe 2010, es End vom Johr,
 do kommt de Winter schon mol vor.
 In dem Johr hats uns schon hert getroff,
 weil durch meterhoher Schnee sin mir geloff.
 E mancher von de Ortsgemeinde
 hat sich gemach beim Schneescheppe Feinde!
 Un irgendwann hert de Spaß a uff,
 was macht man de Schnee a beim Nachbar uff de Parkplatz druff?
 Das hat sich a de Udo gedenkt,
 weil er sich mit seim große Bussje hat uffm Parkplatz aufgehängt!
 Vor Zern es Audo geschob in de Schnee enin, un werre ausm Schnee raus.
 „Ei denne scheiss Schnee schepp ich ne All ball vor ihr eigenes Haus!“
 Es hat gedauert, so is das halt,
 bis de Schnee war weg, es war jo a kalt.
 Die Stimmung dert hinne war e ganzi Zeit schlecht,
 weil Jeder gesieh hat sich selbschd im Recht!
 Ich hätt do zwä Vorschläsch, was mache mer dann?
 „Ei Udo, komm doch in dem Johr meme Schneemobil an!“
 Odder, dass ichs nächschd Johr ned noch mol was schreiwe,
 „Du kännschd a de Schnee mit nem Feuer vertreibe!“
 Ersch is mol Sommer, grün isses Land.
 Was im Winter werd passiere?- Ich bin mol gespannt!

- Musik
- Straußbuwe

In unserm Dorf do isses schä
 un seit neischdem sinn mir a nimmi so klä.
 Mir zähle ganze drei Gemeinde
 un nierschends hammer irgendwo Feinde!
 Vorallem hammer jetzt noch e vierti im Bunde,
 ei die Kärshmohrer sinn e großi Runde.
 Wenn mer guggt, do nuff uf de Bersch,
 dann sieht mer die Skyline von **Ihrer** Kärsch.

So e manschi Stroß is derd privat,
 fer die reschtliche war e Stroßefeschd parat.
 Wenn die jetzt so groß sin, do frot mer sich doch
 wie lang dauerts bis zur eigene Kerb wohl noch?
 Awwer bitte ihr Leid, ihr misse bedenke,
 falls ners geplant han:
 Dun eier Äldschdi mem Amt der Straußmudder beschenke!
 Ich will jetzt nimmie so viel gudes san iwwer eich,
 sonschd bauner uns noch um Kärshmohrcity e Teich!

- Musik
- Straußbuwe

Iwwer viel Pärsher im Dorf do werdd verzehlt,
 die Beer mit de Ehe, die is geschehlt.
 Wenn ichs eich awwer vom nächschde san,
 do denke ner in einerm Traum ned mol dran!
 Politisch strebt er im Gemeinderat uff,
 als Vorstand von de Kapell macht er a enner druff.
 Im Saarland schafft er, weit weg von Dehäm,
 sich dert enni zu angle is doch fer de Thomas kä Probläm!
 Zum Brigitte do sader: „Schatz du bisch mer wischdisch!“
 Awwer no de Arwet lebt er uff un das rischdisch!

Im Mai do wollder no de Arwet ausem Saarland raus
 un musst mache an de rot Ampel e Paus.
 Das is jo bis jetzt noch kä große Sach,
 awwer uf emol macht e Främdi vor seim Fenschder e riesischer Krach.

Er hatse gefrot- der liebe Mann-
 ob er ihr irgendwie helfe kann?
 Do beugt se sich zu ihm – hätts jo ned müsse -
 un frod ne tatsächlich: „Darf ich sie küsse?“
 De Thomas is stolze 51 Jahr,
 mit sowas e Erfahrung hatter noch nie gemach devor!
 Er hat dodruf lieber nix gesa,
 weil Dehäm do hatter jo noch sei Frau!
 Die Fremd is verschwunn un ferdisch war an de Ampel sei Paus
 „Ach Gott, ich muss ausem Saarland schnell raus!
 Was soll ich dann mache? Ich kanns doch kem san,
 sonschd glabt am Schluss noch mei Ehe dran!“
 Es Enn is gut von seiner Geschicht,
 Dehäm zum Brigitte sad er: „Ich küss doch kä Annere, weil du mei beschdes
 bisch!“
 Hanners gehert ihr liebe Männer?
 So wie de Thomas is halt kenner!

Selbschd wenn er hat die Chance uf e neii Fra,
 er nutzt se ned, weil er liebts Brigitte, das is jetzt Jedem klar!

- Musik
- Straußbuwe

Es Wetter war schä e langi Zeit iwwer,
 do geherts a dezu, dass es gebt e Gewitter.
 Jetzt isses passiert in jedem Haus,
 dass ufemol de Strom war aus.
 E Jeder weiß was ma kann dun,
 e mancher awwer frot sich: „Was mach ich dann nun?“
 Es Marlene kommt Häm von de Straußknibbelschicht
 und wollt sich mache fer ins Bett e Licht.
 Der Strom war leider nimmi do,
 es hott jo e Daschelamp un frot sich nur: „Wo?“
 Jetzt hotts das Lämpsche in seiner Hand
 awwer musst se stecke, fer de Akku zu lade, in die Steckdos an de Wand.
 „Warum geht dann das Licht ned? Warum werdsen ned hell?
 Ei wie war das gleich beim Stromausfall schnell?“
 Es iwwerled un iwwerled nächschd e ganzi Nacht,
 wieso dann das Lämpsche in de Steckdos kä Licht anmacht.

Marlene ich sas der, es is doch ned schwer,
 efach e Lämpsche mit Batterie muss her.
 Odder du Ladsch die Daschelamp uff,
 wenn uf de Steckdos noch Strom is druff.
 Also ihr Leid jetzt denke ner dran:
 Licht aus de Steckdos gebts nur, wenn de Strom is an!

- Straußbuwe

Ihr Fraue ich sahns eich, lossens doch sin
 nur Männer feiere no Vadderdach in de Freida enin.
 Do ware paar Määd schon halb besoff
 un sin in die Reuschbach an e Weiher zum Schwimme geloff.
 No dem Owend war sich ens devun abber nimmie sicher ob das war richdisch,
 zu dem Zeitpunkt war die Frage nachem „Warum“ awwer nichtisch!

Am Anfang sin so Aktione jo immer lustisch un schä,
 am Da deno sinn bei manche die Verletzunge abber a ned so klä!
 Do isses gefall in e Loch vom Steg,
 tja in dem Kopp find mer oft a nimmi so de richdische Weg.
 Es Hinnerdäl vum Körper das war jetzt nass,
 dann wärmt mers am Feier jo ned fer de Spaß!
 Wischdisch is dodebei ned wie mer steht,
 sondern, dass em es Gleichgewicht ned verlore geht!

Schon isses passiert, direkt enin,
 de Arsch hat gehunk im Feier drin.
 Es arme Sandra konnt drei Da ned sitze,
 ihr misse mol gugge, mer sieht heit noch Funke uner seine Spitze!
 Mir Fraue ich sans eich, mir sin schon e Haufe
 un sollte an Vadderdach ned so viel saufe!
 Es Sandra werd das a nommo iwwerdenke
 un wenns Feier sieht, sich e nass Duch umhänge.
 Ja die Moral von dere Geschicht:
 Verliern iwterm Feier es Gleichgewicht nicht!

- Musik
- Straußbuwe

Es Sportheim in Schrollbach is Jedem bekannt
 un fer unser Männer es schänschde im Land.
 Am Spordfeschk is dert immer mächtisch viel los
 un die Stimmung mit Sicherhät ganz famos!
 Wenn mer will trinke, dann sollt mer hin laafe,
 sonsch kammer unner Umstänn am nächschde Da,
 fer irgendwo hin e neii Trepp noch kaafe.
 Je später de Owend, je später die Stunn,
 desto mehr Bier hat sei Plätzje uffm Deckel ingefunn.

So machts a de Boris, weil der is jo schlau,
 un hat sich de Owend iwwer paar Litter in de Kopp nin gehau.
 Er wollt jo ned laafe die ewisch lang Stroß
 un parkt dann sei Audo im Sportheim seim Hof.
 Jetzt wars jo schon spät, de Boris wollt fert,
 ei mer losst jo sei Auto a ned grad dert!
 Wie das so is, er fahrt ausm Hof
 un hat in de Aue schon stehe de Schlof.
 „Ei do hats jo gerumpelt, das is jo e Krach!“,
 denkt sich de Boris un werrd vom Tute mol werre wach.
 „Ach Gott wo bin ich dann, das kann jo ned sinn!
 Ich steh jo direkt bei Kaisersch ihm Wolfgang in de Außetrepp drin!
 Was kann ich dann mache? Was werd dann jetzt blos?
 Ei ich schieb mol am Beschde es Audo wo annersch in de Hof!“
 Am nächschde Da, wie sollsen a sinn,
 is jo der Wolfgang nimmi komm die eigen Hausder enin.
 Er ruft schnell sei Neffe mem Bulldock in Besitz,
 er fahrt wie e Lottsche un is schnell wie de Blitz.
 Weg war die Trepp, ma konnt nix mehr fer se mache,
 de Wolfgang vor seim Haus hot a nix mehr se lache!
 Das stellt sich so do, als wärs e riesisch Problem,
 awwer Kaisersch han doch e Gipser Dehäm.
 Un außerdem, mer kanns sich doch denke:
 A de Boris is Gipser un kann dem Wolfgang efach mol e neii Trepp schenke!
 Jetzt is jo das ganze schon nimmi so schlimm,
 ich fro mich nur, was das fer e Trepp werd sin?
 Wie sich das fer e Schlessje gehert,
 griet de Wolfgang e Palasttrepp geteert.
 Un simmer mol ehrlich, der hat doch Glick,
 weil dank em Boris werd das Heisje am Hang jetzt a richdisch schick!

- Musik
- Straußbuwe

Wie vohin schun gesah, is de Christian e Mann mit Besitz,
er fahrt e Bulldock, der laaft wie e Lotsche un is schnell wie de Blitz!
Mer kennt menne der Bulldock verliert immer mehr an Wert,
awwer es is genau annersch, weil schließlich isses e Oldtimer-Gefährt!

Vor e paar Woche gabs e Oldtimer-Treffe im Kuseler-Land
un das war a em Christian bekannt.

„Genau was fer mich!“, hat er sich gedenkt
und direkt sei Oldtimer-Bulldock hin gelenkt.

„Was issen das? Ei kann dann das sin?
Do basst jo mei Bulldock gar ned enin!“

Mer muss richtisch lese, dann wärs em a klar,
das das e Treffe fer Oldtimer- Autos in Wirklichkät war!
„Ich glab ich muss gehe, das war ned richtisch,
es nächschde mol les ich was uffem Schild steht!“-ja Christian das wär wichtisch.

Kaaf der doch e Oldtimer- Auto, was jedem is a bekannt,
dann fahrsche a nimmi umsonschd ins Kuseler-Land.
Unser Christian griet jetzt noch von de Musik e Stück,
uf Oldtimer-Treffe wünsch ich der persönlich e bissje mehr Glück!

- Musik
- Straußbuwe

Es soll im nächschde Johr noch laafe,
drum du ich eich im Anschluss a gere mei Redd verkaafe.
E kläni Spend fer unser Leid,
dass a im nächschde Johr e Strauß steht bereit!

- Straußbuwe

Die Tradition besagt, so solls a sinn,
 de Kerwestrauß gehert in die Redd enin!
 „Wo du hängsch, do werds ned nass,
 kommsch du zum Insatz, han mir Spaß!
 Ich gebb dir e Name: Kerwestrauß
 du bleibsch jetzt e Johr hänge dojaus!“

Als Moses durch die Wüste ging,
 er einen Tropfen Wasser fing.
 Noch größer ist das Wunder hier,
 man ruft: „Harry“ und es kommt Bier!
 Im Namen des Bieres, des Weines und des Schnapses
 -Prost!

- Musik
- Straußbuwe

Ich derf mich a bei eich bedange,
 dass ihr an meine Ohre hange.
 Ich wünsch eich noch e schäni Zeit,
 mir mache uns jetzt fer die drei erschde bereit.

Bleiwe doch noch e bissje hier,
 bei gudem Esse un noch paar Bier!

ENDE